

LOU MESTIÉ DE JARDINIÉ

Quand aguère aperi que douge an e que li Fraire de l'escolo m'aguèron fa estudia tóuti si libre, passère lou certificat d'Estudi Primari, e sieguère lèst pèr faire moun intrado dins la vido dóu mounde. Ma maire me prengué 'n jour à despart e me digè :

- *Eh ! bèn ! moun drole, quete mestié vos aparene*

E iéu de iéu respondre :

- *Maire, farai ço que voudrés!*

Ah ! se moun paire n'èro esta mort tres an avans ; se desempièi, l'estable n'èro vuege de la bramadisso dis agnèu e dóu roumiage dis anouge e d i fedo, ma chausido sarié lèu estado facho. Mai fauguè se vira dóu coustat de la terro, e assaja lou mestié de païsan.

Avian quàuqui caire de terro, un tros de jardin, que ma maire fasié tarvaia à journado dóu tèms qu'elo emé mi sorre anavon, d'avans jour jusqu'après soulèu coucha, gagna quàuqui sòu i fabrico.

Eiça, vers lou mes de febrí, en bello matinado que lou tèms èro siau, emé de pichot nivo un pau eici un pau eila, ma maire me mandè semena de favo. Partiguère fièr coume Artaban, emé 'un grand panié bousié plen de favo, un courdèu, uno eissado...

Faguère tres o quatre rego de favo, e à chasque cop d'eissado me revirave pèr vèire s'èron bèn drecho: fasiéu gaire de travai, mai lou fasiéu bèn!

Tout-à-n'un op se meteguè à ploure e lou nivo se fasié sournaru dóu caire dóu castèu de Suso – qu'acò marcavo de chavano – alor, pèr pas retrourna de pes à l'oustau, en manco de resounamen sus li causo de la germinacioun di planto e dóu iais que se travaio, faguère un trapalas au mitan de la terro e ié vuejère dintre tóuti li favo que restavon à semena. Aquelo bello obro facho, prenguère lèu d'aquelo erbo, e rintrère à l'oustau trempe coume uno soupo.

- *Bèn, - ma maire me faguè – as agu lou tèms de fini de semena avans la plueio?*

- *Voui, ié respoundeguère, bèn afeciouna, e tout countènt de iéu !*

- *Alor, me rebequè, d'abord que plou fai bèu tèms pèr la semènço.*

Ah ! lou crese que fasié bèu tèms. Quatre o cinq jour après, mi rego de favo sourtien drecho coume un I, pièi, à-n'un moulun espetaclous tres o quatre kilò greieron magnificamen. Li gènt que passavon coumencèron de s'escacagna dóu rire ; tóuti me galejavon sus moun biais dóu mestié de païsan, e, pèr trufarié, tóuti voulien me louga pèr semena de favo.

Aquel auvé me desgoutè dóu mestié . Uno, que n'aviéu pas proun de forço pèr travaia la terro; outro que degun me couseiavo pèr lou biais de la ravaia; un vèspre en arribant reballère moun eissado.

- *Maire, diguère, farai tout ço que voudrés. Mai vole plus estre païsan.*

Henri ALCON